

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Fünff Bücher, Vonn Kriegs Regiment vnd Ordnung, Wie sich ein jeder Kriegszmann inn seinem Ampt vnnnd Beuelch halten soll, was zu anfang eines Kriegs zuerwegen vnnnd zubetrachten sey, Auch vonn ...**

**Fronsberger, Leonhardt**

**[Franckfurt am Main], 1558**

**VD16 F 3129**

Nota.

[urn:nbn:de:bsz:31-41862](https://nbn-resolving.org/urn:nbn:de:bsz:31-41862)



## Von allerhand kriegsrüstung vnd gebrauch/

man es erreichen mag/alles in die Statt gefürt werden/damit man es auch zur notturfft zubawen/zubrennen/vnnd warzu man sein notturfftig wird/zubrauchen habe.

Wa auch/als an etlichen orten pfleglich/die mist vor den Stetten sein/sol man/so man sich der Belägerung versicht/kein mist mer auß der Statt/sonder auch den ihenigen so darvor ligt/wider hinein füren lassen/damitt man denselbigen zum verdarressen/auch sonst außzufüllen/Ratzen vnnd andere Bew/darzu treffenlich gut/zumachen/gehaben vnd brauchen möge.

Zum grossen geschütz sollen viel Pappeyriner ladungen gemacht/geladen vnnd zugericht/vnnd zum geschütz verordnet werden/dann sie seind fast gut fürderlich zuschiessen/nicht allen inn besatzungen/sonnder auch im Feld/aber von schlechtem Kelbern leder dise ladungen gemacht/seind besser dann das sie ettwas mehr kosten.

### Nota.

In einer besatzung so es die zeit erleiden mag/vnnd man viel viechs hatt/da dann täglich viel fütterung auffgeht/ist gut das man viel viechs hinweg mezge/in Thunnen vnd Fesser einsaltz/damitt die fütterung gespart/vnnd ander pferd vnd vihe dester länger mit fütterung erhalten werden möge.

### Holz einer Besatzung.

In einer jeden besatzung ist gut/das man mitt gutten starcken blöchern geschränkete Blochheuser mach/zimlicher grösse/nach gelegenheyt des platz/auch innen vnd aussen wol geschlossen/vnd dermassen gemacht/das ein not erleiden möge/auch gutter höhe/dieselbige Blochheuser legt man etwann an ein trocken ort/da es vorm regen vnnd wetter verwart lige/also mag es lange zeit vnnd viel jar erhalten werden/Ls sollen auch die Blöck ordenlich zusamen verzeichnet werden/damit man inn der eyl wissen möge/wie es zusamen vnd auff einander gehöre/So man dann an einer besatzung anhebt zuschiessen/so soll man zu beyden seyten/neben dem ort/da man die mauren bescheußt/die Blochheuser vō stund hinder der maur/da man sie nit bescheußt/auffrichten/also das/so die maur beschossen/vnd daselbst hinein gestürmpt wird/man zwischen den Blochheusern hinein stürmen muß/dañ sollen auff dem boden gute Streitwehren/vnnd dieselbigen mit hagel/haascken vnd handtschützen wol besetzt sein/darnach auff der nächsten/auff dem vndersten gleicher gestalt/also dann zu oberst soll es besetzt sein/mitt den ihenigen/so mit feurwerck/mit steinen werffen/auch mitt heissem öl vnnd siedigem wasser schütten/man mag auch also geschränkete Blochheuser machen/mit mist vnd erden außfüllen/vnnd oben groß geschütz darauff ziehen/das heisset man Ratzen.

Also